



11. okt. 2010

Inatsisartut suleriaasiat § 36 immikkoortoq 1 naapertorlugu Naalakkersuisunut imaattumik apeqquteqarniarpunga.

**Naalakkersuisunut Apeqqut:**

**2009-miit 2013-imut Naalakkersuisut suleqatigiinnissaannut isumaqatigiissut Nuummi ulloq 10. juni 2009 atsiorneqartumi allaqqavoq: “Akileraarutit akitsuutillu ullumikkornit qaffasinnerusumut inissinnissaat Naalakkersuisut siunertarinngilaat.” Sooq isumaqatigiissut eqqortinnagu Naalakkersuisooqatigiit akitsuutinik qaffaaniarpat?**

(Inatsisartuni ilaasortaq Kristian Jeremiassen, Siumut)

**Tunngavilersuut:**

Isumaqatigiissut isumaqatigiissutaavoq malinneqartussa, maannali ersarissivoq Naalakkersuisooqatigiinnissamik isumaqatigiissut malinneqanngitsoq. Ukiaq manna Inatsisartut ataatsimiinnitsinni Naalakkersuisut akitsuutinik qaffaanissamut makkuninnga assersuutissannik ilaatigut siunnersuuteqarput:

**Immikkoortoq 26 Qamutit motorillit akileraarutaat pillugit Inatsisartut inatsisaata allanngortinneqarneranik Inatsisartut inatsisissaattut siunnersuut**

**Immikkoortoq 27 Aningaasanik ikisilluni pinnguaatinut akileraarut pillugu Inatsisartut inatsisaata allanngortinneqarnissaanik siunnersuut.**

**Immikkoortoq 29 Nukissiornermi ikummatissat avatangiisinut akitsuutaat pillugit Inatsisartut inatsisissaattut siunnersuut**

Oqaluuserisassat pingasut immikkoortut 26,27,29-ilu innuttaasunut kinguneqaatissai misissoqqaarnagit Naalakkersuisut saqqummiuppaat. Isumaqarpunga akitsuutit inuiaqatigiinnut sakkortuumik sunniuteqassasut pissutigalugu innuttaasut akilertussaangamikkitt aningaasartuutit qaffaneri.

Naalakkersuisooqatigiinnermi isumaqatigiissut tassaavoq suleqatigiinnissamut isumaqatigiissut inuiaqatigiit qanoq ingerlanneqarnissaannut tikkuussisuusoq, taamaattorli Naalakkersuisooqatigiinnissamut isumaqatigiissut malinnagu allaanerusumik ingerlanersut sooq paaserusuppara.

Naalakkersuisooqatigiinnermi siunertat ilaat qimanneqarsimasut malunnarpoq paasinnittaaseralu malillugu ullormiit ullormut aalajangersaasarnerit tamatumani pissutaapput.

Apeqquteqaatiga ullut suliffiusut qulit qaangiutsinnagit akineqarnissaa qinnutigivara.